

**PREDNACRT**

**ZAKON O TRGOVINI**

Na osnovu člana 22. Statuta Brčko distrikta BiH («Službeni glasnik Brčko distrikta BiH» broj 02/10), Skupština Brčko distrikta BiH na \_\_\_\_\_ redovnoj sjednici održanoj \_\_\_\_\_ 2010. godine, usvaja:

## ZAKON O TRGOVINI

### DIO PRVI - OSNOVNE ODREDBE

#### Član 1. (Predmet)

Ovim zakonom propisuju se:

- (a) uslovi za obavljanje trgovine i oblici trgovine;
- (b) uslovi za obavljanje trgovinskih usluga;
- (c) način obrazovanja cijena;
- (d) trgovačka evidencija;
- (e) zaštita potrošača;
- (f) nedopušteno trgovanje;
- (g) privremene mjere ograničavanja tržišta,
- (h) nadzor i druga pitanja od značaja za obavljanje trgovine na teritoriji Brčko distrikta Bosne i Hercegovine (u daljem tekstu: Distrikt).

#### Član 2. (Definicije)

Pojedini izrazi upotrijebljeni u ovom zakonu imaju sljedeće značenje:

- a) „**preduzeće** „, označava pravno lice koje samostalno na tržištu obavlja djelatnost radi sticanja dobiti;
- b) „**preduzetnik**„, označava registrovano fizičko lice koje samostalno na tržištu obavlja djelatnost radi sticanja dobiti;
- c) „**fizičko lice**“ je lice koje se nije registrovalo za obavljanje djelatnosti;
- d) „**trgovina**“ je kupovina i prodaja robe i vršenje trgovinskih usluga na tržištu Distrikta;
- e) „**prodajni objekat**“ je prostor u kojem se obavlja trgovina, koji je izgrađen u skladu sa važećim urbanističko-građevinskim propisima;
- f) „**trgovina na veliko**“ je:
  - 1) kupovina robe radi dalje prodaje trgovcima na malo, industrijskim, trgovačkim i profesionalnim korisnicima i ustanovama, drugim trgovcima na veliko kada kupuju robu radi dalje prodaje, uz obavezno izdavanje odgovarajuće dokumentacije;
  - 2) kupovina robe koja se po nalogu kupca neposredno isporučuje bez prethodnog uskladištenja tzv. tranzitni promet;
  - 3) kupovina i prodaja na stranom tržištu.
- g) „**ambulantna prodaja**“ je oblik trgovine na veliko;
- h) „**trgovina na malo**“ je prodaja krajnjem potrošaču radi zadovoljavanja potreba njegovog domaćinstva;
- i) „**trgovinska usluga**“ je djelatnost kojom se omogućava i podstiče obavljanje

razmjene od proizvođača do krajnjeg potrošača.

### **Član 3. (Obavljanje trgovine)**

- (1) Trgovinom se mogu baviti pravna i fizička lica koja su registrovana za obavljanje te djelatnosti (u daljem tekstu: trgovac).
- (2) Trgovac je samostalan pri izboru oblika obavljanja trgovine i može se baviti trgovinom na veliko, trgovinom na malo, trgovinom na veliko i malo i trgovinskim uslugama, ako zakonom nije drugačije propisano.
- (3) Odredbe ovog zakona odgovarajuće se primjenjuju i na:
  - a) pravno i fizičko lice registrovano za obavljanje djelatnosti proizvodnje i obavljanja usluga, kada svoje proizvode i usluge prodaju na tržištu;
  - b) fizičko lice koje se bavi poljoprivrednom proizvodnjom, kada svoje poljoprivredne proizvode prodaju na tržištu;
  - c) fizičko lice koje se bavi zanatskom djelatnošću, kao i lice koje se bavi domaćom radinošću kada svoje proizvode prodaje na tržištu;
  - d) fizičko lice koje na osnovu ugovora sa trgovcem, obavlja za trgovca trgovinu na malo izvan prodavnice;
  - e) pravno lice i preduzetnik koji se bavi trgovinom za koju nije registrovan;
  - f) fizičko lice koji se bavi trgovinom bez odobrenja za obavljanje trgovine.

### **Član 4. (Način obavljanja trgovine)**

- (1) Trgovina se obavlja slobodno pod jednakim zakonskim uslovima za sve trgovce u skladu sa dobrim poslovnim običajima, načelima lojalne konkurencije, trgovačkim pravilima i na način na koji se ne nanosi šteta drugom trgovcu, kupcu, odnosno potrošaču.
- (2) Roba koja se stavlja u promet mora biti u skladu sa standardima tehničkim normativima i kvalitativnim normama propisanim ili priznatim kao uslov za njihovo stavljanje u promet ili upotrebu na tržištu Bosne i Hercegovine.
- (3) Trgovačka pravila utvrđuju se u okviru komora ili drugih oblika udruživanja trgovaca u skladu sa propisima.

### **Član 5. (Ovlašćenja organa distrikta)**

- (1) Aktima organa Distrikta ne može se ograničavati nastupanje na tržištu, narušavati konkurencija, niti se mogu pojedini trgovci ili potrošači stavljati u neravnopravan položaj na tržištu.
- (2) Izuzetno od stava (1) ovog člana, ukoliko nastanu veći poremećaji u proizvodnji i prometu određene robe, Vlada može utvrditi privremene mjere za sprečavanje i otklanjanje tih poremećaja.

## **DIO DRUGI - USLOVI ZA OBAVLJANJE, OBLICI TRGOVINE I KAZNENE**

## **ODREDBE**

### **GLAVA I – USLOVI ZA OBAVLJANJE TRGOVINE**

#### **Član 6. (Uslovi)**

(1) Trgovinu na veliko i trgovinu na malo može obavljati trgovac koji se bavi trgovinom na osnovu registracije i koji ispunjava uslove propisane ovim zakonom i drugim propisima.

(2) Trgovac može bez upisa u registar obavljati i druge poslove u manjem obimu koji služe uspješnom obavljanju trgovine, a uobičajeno se obavljaju uz ovu djelatnost, kao što su poslovi utovara, prevoza i istovara robe, poslovi dostavljanja robe kupcu i slično, a obavljanje tih poslova ne predstavlja redovnu djelatnost trgovca.

(3) Za obavljanje trgovine na veliko i trgovine na malo, trgovac je dužan osigurati prodajni objekat ili drugo prodajno mjesto koje ispunjava uslove propisane ovim zakonom i drugim propisima.

(4) Trgovac je dužan:

a) na svakom prodajnom objektu, kao i prilikom prodaje robe van prodavnice istaći naziv ili skraćeni naziv;

b) istaći radno vrijeme;

c) u svakom prodajnom objektu osigurati:

1) utvrđena pisana pravila o uslovima prodaje koja se odnose na cijenu, način plaćanja i isporuke, bonifikacije i slično i čini ih na prikladan način dostupnim kupcu;

2) obavještenje o zabrani prodaje alkoholnih pića, drugih pića koja sadrže alkohol i prerađevina od duvana licima mlađim od 18 godina;

3) isticanje cijene u domaćoj valuti;

4) izdavanje računa za prodatu robu, u skladu sa posebnim propisima;

d) poštivanje pravila iz tačke b) i c) ovog stava.

#### **Član 7. (Rješenje o odobravanju obavljanja djelatnosti)**

(1) Trgovac može otpočeti obavljati djelatnost, mijenjati i proširivati djelatnost kada od Odjeljenja za javnu sigurnost dobije rješenje o odobravanju obavljanja djelatnosti.

(2) Postupak za izdavanje rješenja iz stava (1) ovog člana pokreće se podnošenjem zahtjeva.

(3) Uz zahtjev iz stava (2) ovog člana, kao dokaz o ispunjavanju uslova za obavljanje trgovinske djelatnosti, prilaže se:

a) ovjerena pisana izjava o ispunjavanju propisanih uslova za poslovne prostorije, opremu, uređaje i sredstva pomoću kojih se obavlja trgovina i dokaz koji se odnosi na stručnu spremu zaposlenika;

b) ovjerena kopija upisa u registar suda;

c) obavijest o datumu početka rada za svaki poslovni prostor .

(4) Odjeljenje iz stava (1) ovog člana dužno je rješenje o odobravanju obavljanja djelatnosti donijeti u roku od pet radnih dana, od dana podnošenja urednog i potpunog zahtjeva.

(5) Rješenje iz stava (4) ovog člana dostavlja se:

- a) podnosiocu zahtjeva;
- b) Inspektoratu;
- c) Direkciji za finansije – Poreska uprava;
- d) Agenciji za statistiku.

(6) Odjeljenje za javnu sigurnost u postupku izdavanja rješenja kojim se odobrava obavljanje djelatnosti, ne provjerava pravni osnov korištenja poslovnog prostora.

(7) Postojanje rješenja o odobrenju za upotrebu prodajnog objekta, nije minimalno tehnički uslov za početak rada prodajnog objekta.

(8) Ispunjenost uslova u pogledu sanitarno-zdravstvene zaštite, zaštite na radu, zaštite čovjekove okoline, te druge uslove koji su potrebni za obavljanje trgovinske djelatnosti i stava (7) ovog člana, provjerava nadležna inspekcija u redovnom inspeksijskom pregledu, najkasnije u roku od 120 dana od dana dostavljanja rješenja iz stava (4) ovog člana.

(9) Sadržaj izjave iz stava (3) tačka a) ovog člana utvrđuje se pravilnikom koji donosi šef Odjeljenja za javnu sigurnost.

(10) Minimalno-tehnički uslovi za poslovne prostore i stočne pijace, uslovi obavljanja trgovine izvan poslovnog prostora i drugi uslovi koji su potrebni za obavljanje trgovačke djelatnosti utvrđuju se pravilnikom koji donosi šef Odjeljenja za prostorno planiranje i imovinsko-pravne poslove.

### **Član 8. (Odgovornost za štetu)**

Trgovac odgovara za štetu prouzrokovanu trećim licima, koja je izazvana davanjem netačne izjave o ispunjavanju uslova iz člana 7. stav (3) ovog zakona.

### **Član 9. (Predmet poslovanja)**

(1) Trgovac se može baviti djelatnošću za koju je registrovan.

(2) Original ili ovjeren prijepis rješenja iz člana 7. stav (4) ovog zakona, trgovac je dužan držati u poslovnim prostorijama i na svakom prodajnom mjestu.

## **GLAVA II – OBLICI TRGOVINE**

### **Odjeljak A - Trgovina na veliko**

### **Član 10. (Trgovina na veliko)**

(1) Trgovina na veliko se obavlja u skladištima i stovarištima koji ispunjavaju propisane uslove.

(2) Trgovina na veliko u tranzitu je kupovina i prodaja robe, bez zadržavanja robe u skladištu trgovca na veliko.

(3) Za obavljanje trgovine na veliko u tranzitu nije obavezno posjedovanje skladišta.

(4) Za pojedine vrste robe može se utvrditi da se trgovina na veliko ne može obavljati u tranzitu.

(5) Vrstu robe za koju se trgovina na veliko ne može obavljati u tranzitu, utvrđuje Vlada Brčko distrikta BiH (daljem tekstu: Vlada) posebnom Odlukom, na prijedlog šefa Odjeljenja za privredni razvoj, sport i kulturu (daljem tekstu: Odjeljenje).

#### **Član 11. (Ambulantna prodaja)**

(1) Samo proizvođač robe ili trgovac koji obavlja trgovinu na veliko, može organizovati ambulatnu prodaju.

(2) Vrstu robe koja se može prodavati putem ambulatne prodaje, utvrđuje Vlada posebnom Odlukom na prijedlog šefa Odjeljenja.

#### **Član 12. (Trgovačka knjiga trgovine na veliko)**

(1) Trgovac koji obavlja trgovinu na veliko dužan je da vodi trgovačku knjigu na veliko ili na drugi zakonom propisan način obezbijedi evidenciju o kupovini i prodaje robe.

(2) Oblik i način vođenja trgovačke knjige iz stava (1) ovog člana utvrđuje se pravilnikom koji donosi šef Odjeljenja.

### **Odjeljak B – Trgovina na malo**

#### **Član 13. (Trgovina na malo)**

(1) Trgovina na malo se obavlja u prodajnom objektu ili drugom prodajnom mjestu koje ispunjava propisane uslove.

(2) Trgovina na malo se obavlja u:

- a) prodavnici;
- b) robnoj kući;
- c) samoposlugi;
- d) dragstoru;
- e) diskontnoj prodavnici;
- f) butiku;
- g) pokretnoj prodavnici;
- h) kiosku;
- i) benzinskoj stanici;
- j) putem automata;
- k) pijaci na malo;
- l) skladištu ili stovarištu;
- m) sajmu;
- n) vašaru i drugom mjestu u posebnoj prigodi.

(3) Druga prodajna mjesta za trgovinu na malo su:

- a) porodično poljoprivredno gazdinstvo;
- b) rashladna vitrina;
- c) pokretni stol.

(4) Oblici trgovine na malo su i:

- a) prodaja s ponudom od vrata do vrata;
- b) kataloška prodaja - otprema poštom;

- c) telefonska prodaja i
- d) prodaja putem elektronskih medija

**Član 14.**  
**(Privremena i povremena prodaja)**

- (1) Trgovac može vršiti trgovinu na malo, osim komisione prodaje, van poslovnih prostorija, u pokretnim prodavnicama i drugim oblicima privremene i povremene prodaje, u skladu sa ovim zakonom.
- (2) Mjesta na kojima se može vršiti prodaja i vrstu robe koja se može prodavati u skladu sa stavom (1) ovog člana određuje Odjeljenje za prostorno planiranje i imovinsko pravne-poslove.

**Član 15.**  
**(Samostalna djelatnost i kompenzacioni poslovi)**

- (1) Lica iz člana 3. stav (3) tačke b) i c) mogu slobodno prodavati proizvode ostvarene djelatnošću kojom se bave u skladu sa ovim zakonom.
- (2) Pod proizvodima iz stava (1) ovog člana, smatraju se i proizvodi dobijeni u kompenzacionom poslu, za isporučene sopstvene proizvode.
- (3) Mjesta na kojima se može vršiti prodaja robe iz stava (1) i (2) ovog člana određuje Odjeljenje za prostorno planiranje i imovinsko pravne-poslove.

**Član 16.**  
**(Kataloška prodaja)**

Trgovac koji nudi robu preko kataloga označava u katalogu prodajnu cijenu robe, vrijeme važenja te cijene i druge uslove prodaje.

**Član 17.**  
**(Trgovina ličnim nuđenjem)**

- (1) Trgovina ličnim nuđenjem je trgovina na malo, koju trgovac obavlja tako što nudi robu ili usluge ličnim prilaženjem određenom potrošaču, koji je fizički prisutan na mjestu ponude, kada potrošač nije tražio da mu se učini ponuda, a naročito prodajom od vrata do vrata.
- (2) Trgovinu ličnim nuđenjem može da obavlja trgovac, koji je registrovan za takav način trgovine i koji ispunjava druge uslove propisane ovim zakonom, bez obzira da li mu je to isključiva ili jedna od više djelatnosti koje obavlja.
- (3) Prodaju iz stava (2) ovog člana trgovac obavlja lično ili preko lica kojem daje ovlašćenje za prodaju robe.
- (4) Trgovac i lica iz stava (3) ovog člana dužna su kod sebe imati dokaze o ispunjavanju uslova iz stava (2) ovog člana.

**Član 18.**  
**(Javno nadmetanje)**

- 1) Javno nadmetanje, kao poseban oblik prodaje robe, organizovana je prodaja robe najboljem kupcu na osnovu javnog nadmetanja na određenom mjestu i u određeno vrijeme.
- 2) Javno nadmetanje može biti stalno i povremeno.

### **Član 19. (Prodaja na daljinu)**

- (1) Daljinska trgovina na malo je prodaja robe i usluga koju trgovac vrši ponudom putem sredstava komunikacija, potrošaču koji nije neposredno prisutan.
- (2) Daljinska trgovina na malo je naročito elektronska trgovina, kataloška prodaja, kao i TV prodaja, trgovina putem pošte, štampanih pošiljki, reklamnih materijala sa narudžbenicom, telefona, tekstualnih ili multimedijalnih poruka u mobilnoj telefoniji i automata.
- (3) Elektronska trgovina se uređuje posebnim zakonom.
- (4) Prodaju na daljinu može da organizuje samo trgovac koji je registrovan za tu vrstu trgovine, bez obzira da li mu je to isključiva ili jedna od više djelatnosti koje obavlja i na takvu prodaju se primjenjuju odredbe ovog zakona o trgovini na malo.

### **Član 20. (Trgovina plaćanjem robe prije isporuke)**

- (1) Trgovac koji obavlja trgovinu na malo sa plaćanjem robe prije isporuke za motorna vozila, ogrjev i slično, dužan je da vodi evidenciju o redu uplate koja sadrži:
  - a) redni broj;
  - b) ime kupca i
  - c) datum uplate.
- (2) Prilikom isporuke u ovu evidenciju unosi se datum isporuke.
- (3) Trgovac iz stava (1) ovog člana dužan je da kupcu izda potvrdu sa podacima o redu uplate i da se pri isporuci pridržava reda uplate.
- (4) Kupac se, bez njegove saglasnosti, ne može brisati iz evidencije i ne može se mijenjati njegovo mjesto u redu uplate.

### **Član 21. (Garantni list)**

Ako se proizvod prodaje sa garantnim listom, trgovac prilikom prodaje u garantni list upisuje datum prodaje i to potvrđuje pečatom i potpisom odgovornog lica.

### **Član 22. (Trgovačka knjiga trgovine na malo)**

- (1) Trgovac koji obavlja trgovinu na malo, u svakom prodajnom objektu ili na drugom prodajnom mjestu drži trgovačku knjigu, koja sadrži evidenciju o kupovini i prodaji robe.
- (2) Evidencija o kupovini robe vodi se na osnovu fakture, dostavnice i prijemnice ili

drugog dokumenta o kupovini robe.

(3) Evidencija o prodaji robe vodi se na osnovu fakture, trake registar kase, paragon bloka i drugih dokumenata koji sadrže podatke o prodatoj robi.

(4) Vrijednost kupljene i prodane robe evidentira se po maloprodajnim cijenama.

(5) Trgovac koji obavlja trgovinu na malo ne može staviti u promet robu koja nije evidentirana u trgovačkoj knjizi.

(6) Trgovac je dužan obezbijediti dostupnost evidencija iz ovog člana.

(7) Oblik i način vođenja trgovačke knjige na malo utvrđuje se pravilnikom koji donosi šef Odjeljenja.

### **Član 23. (Vjerodostojna dokumentacija)**

(1) U svakoj fazi prometa i transporta, robu obavezno prati vjerodostojna dokumentacija kao što je faktura, dostavnica, otpremnica, otkupni blok i slično, iz koje se nedvosmisleno može utvrditi porijeklo robe, količina i vrsta robe, naziv i mjesto kupca.

(2) Dokumentaciju, iz stava (1) ovog člana, trgovac je dužan dostaviti na uvid odmah ili najdalje u roku od 24 sata od momenta kada je nedostatak utvrđen.

(3) Kod ambulantne prodaje, robu u prometu prate dokumenti o porijeklu, količini i vrsti robe i odgovarajući dokument o izvršenoj prodaji kupcima.

(4) Trgovac kupcu izdaje račun, otpremnicu, dostavnicu i slično za svaku prodatu robu ili izvršenu uslugu, u skladu sa propisima.

(5) Obaveza vođenja trgovačke evidencije ne odnosi se na lica iz člana 15. ovog zakona, koji imaju pravo da bez posebne registracije prodaju svoje proizvode.

## **Odjeljak C - Otkup poljoprivrednih proizvoda**

### **Član 24. (Otkup)**

Otkup poljoprivrednih proizvoda, šumskih plodova i stoke se obavlja slobodno pod uslovima propisanim ovim zakonom.

### **Član 25. (Mjesta na kojima se vrši otkup)**

(1) Otkup poljoprivrednih proizvoda se vrši kupovinom od poljoprivrednika:

a) u otkupnim stanicama;

b) na otkupnim mjestima i

c) na porodičnim poljoprivrednim gazdinstvima.

(2) Otkupna stanica i otkupna mjesta imaju odgovarajuću prostoriju, određen i uređen prostor za prijem, mjerenje, skladištenje, utovar i istovar robe i ambalaže.

(3) Mjesta iz stava (2) ovog člana moraju ispunjavati higijensko-tehničke i sanitarne uslove.

### **Član 26. (Otkupna stanica za otkup stoke)**

- (1) Otkup stoke se vrši u otkupnim stanicama.
- (2) Otkupna stanica ima izgrađen ili ograđen prostor za prihvatanje i utovar stoke i ispunjava higijensko – tehničke i sanitarne uslove.
- (3) Uslovi koje treba da ispunjava otkupna stanica i otkupno mjesto utvrđuju se pravilnikom koji donosi šef Odjeljenja za prostorno planiranje i imovinsko-pravne poslove.

**Član 27.**  
**(Posebni uslovi za obavljanje otkupa)**

- (1) Otkup iz člana 25. i 26. ovog zakona, izuzev otkupa koji se vrši na porodičnim poljoprivrednim gazdinstvima, u poslovnim prostorijama, otkupnim stanicama i otkupnim mjestima, se vrši ako su pored uslova propisanih ovim i posebnim zakonima, ispunjeni uslovi:
  - a) da je istaknuta firma i obavještenje o periodu i vremenu kupovine proizvoda, otkupnoj cijeni i roku plaćanja;
  - b) da se naknada za kupljene proizvode isplaćuje preko blagajne, banke ili pošte;
  - c) da se Odjeljenju za javnu sigurnost, najkasnije sedam dana prije početka kupovine, pored dokaza iz člana 7. stav (3) ovog zakona, podnese prijava sa podacima o adresi poslovne prostorije, otkupne stanice, otkupnog mjesta, vrsti proizvoda i periodu i vremenu u kome se vrši kupovina.
- (2) Otkup iz člana 25. i 26. ovog zakona se ne može vršiti ako Odjeljenje za javnu sigurnost ne donese rješenje o odobravanju obavljanja djelatnosti.

**Član 28.**  
**(Račun iz otkupnog bloka)**

- (1) Trgovac za otkupljene proizvode izdaje račun iz otkupnog bloka u koji upisuje podatke koji se odnose na:
  - a) firmu, odnosno naziv, sjedište i adresu kupca;
  - b) ime i prezime, JMBG, prebivalište i adresu prodavca;
  - c) naziv, količinu, kvalitet, odnosno klasu kupljenih proizvoda;
  - d) cijenu kupljenih proizvoda;
- e) datum isplate.
- (2) Račun iz otkupnog bloka potpisuje prodavac, ovlaštenu radnik i ovjerava se pečatom kupca.
- (3) Trgovac u otkupnoj stanici, otkupnom mjestu, odnosno radnji čuva knjigu kopija izdatih računa iz otkupnih blokova, u skladu sa propisima o čuvanju knjigovodstvenih isprava.

**Član 29.**  
**(Kupovina stoke na stočnim pijacama)**

- (1) Pravna i fizička lica mogu vršiti kupovinu stoke i na stočnim pijacama.
- (2) Kupovina stoke evidentira se putem otkupnog bloka.

**Član 30.**  
**(Trgovina stokom između fizičkih lica)**

(1) Trgovina stokom između fizičkih lica se obavlja na stočnim pijacama i na porodičnim poljoprivrednim gazdinstvima.

(2) Trgovina iz stava (1) ovog člana na stočnim pijacama se obavlja pod uslovom da:

a) prodavac prodaje stoku koja je u njegovom vlasništvu i za koju posjeduje propisanu dokumentaciju;

b) kupac kupuje stoku za svoje potrebe.

(3) Pod kupovinom stoke za svoje potrebe podrazumijeva se kupovina koju vrše fizička lica za obavljanje djelatnosti i kupovina koju vrše druga fizička lica za vlastite potrebe.

(4) Trgovina iz stava (1) ovog člana na porodičnom poljoprivrednom gazdinstvu obavlja se samo stokom koja je uzgojena na tom poljoprivrednom gazdinstvu.

### **GLAVA III - TRGOVINSKE USLUGE**

#### **Član 31. (Trgovinske usluge)**

(1) Trgovac je samostalan u izboru oblika obavljanja trgovinskih usluga.

(2) Trgovinske usluge su:

a) posredovanje;

b) zastupanje;

c) komisiona usluga;

d) uskladištenje;

e) otprema i doprema, odnosno špedicija;

f) kontrola kvaliteta i kvantiteta robe;

g) franšizing;

h) usluga iznajmljivanja nosača zvuka i slike;

i) robna berza;

j) marketing;

k) pijaca na veliko;

l) pijaca na malo;

m) trgovinski centar;

n) stočna pijaca;

o) vašar;

p) sajam i

r) aukcijska kuća i druge usluge uobičajene u trgovini.

#### **Član 32. (Evidencije)**

(1) Trgovac koji se bavi pružanjem trgovinskih usluga vodi evidenciju o primljenoj i prodatoj, odnosno isporučenoj robi i izvršenoj usluzi.

(2) Evidencija iz stava (1) ovog člana vodi se za svako prodajno mjesto, odnosno poslovnu jedinicu u kojoj se vrše usluge.

(3) Evidencije i isprave se drže u svakom prodajnom mjestu, odnosno poslovnoj jedinici, a isprave o prijevozu u prijevoznom sredstvu.

(4) Evidencija se vodi na osnovu isprave o izradi robe, isprave o nabavci robe ili isprave o naručenim uslugama.

(5) Isprave iz stava (4) ovog člana su: faktura, dostavnica, prijemnica, radni nalog,

porudžbenica, revers i slično.

(6) Lica iz stava (1) ovog člana ne mogu prodavati ni prevoziti robu, odnosno vršiti usluge, za koju nemaju isprave ili koje nisu propisno evidentirane.

(7) Oblik, sadržina i način vođenja evidencije utvrđuje se pravilnikom koji donosi šef Odjeljenja.

### **Član 33. (Posredovanje)**

Usluga posredovanja je dovođenje u vezu komitenta s trećim licima radi zaključivanja ugovora, u kojem posrednik ostvaruje pravo na naknadu ako taj ugovor bude zaključen.

### **Član 34. (Zastupanje)**

Usluga zastupanja je obavljanje trgovine i usluga u ime i za račun trgovca kao i obavljanje servisne službe i drugih tehničkih usluga koje se odnose na održavanje i popravku proizvoda.

### **Član 35. (Komision)**

Usluga komisiona je prodaja ili kupovina u svoje ime, a za račun komitenta.

### **Član 36. (Skladištenje robe)**

Usluga uskladištenja robe je smještaj i čuvanje robe, kao i drugi poslovi koji se uobičajeno obavljaju uz smještaj i čuvanje robe.

### **Član 37. (Špedicija)**

Usluga špedicije, odnosno otpreme i dopreme robe je otpremanje i dopremanje robe u svoje ime, a za račun komitenta, kao i drugi poslovi koji se uobičajeno obavljaju uz otpremu i dopremu robe.

### **Član 38. (Kontrola kvaliteta i kvantiteta)**

Usluge kontrole kvaliteta i kvantiteta robe su usluge koje obavlja ovlašteno lice koje je obavezno da stručno i nepristrasno obavi kontrolu kvaliteta i kvantiteta robe i usluga i o tome izda odgovarajući dokumenat naručiocu kontrole.

### **Član 39. (Franšizing)**

(1) Usluga franšizinga je poslovni odnos gdje jedna strana, davalac franšizinga, ustupa drugoj strani, primalac franšizinga, pravo da u svom poslovanju koristi ime, proizvode i usluge, proizvodno i poslovno iskustvo davaoca franšizinga.

(2) Davalac franšizinga se obavezuje da primaocu franšizinga pruža potrebnu stručnu pomoć.

#### **Član 40. (Robna berza)**

(1) Robna berza je subjekat čija je djelatnost trajno organizovanje sastanaka između privrednih subjekata radi zaključivanja ugovora o kupovini i prodaji robe.

(2) Pod berzanskim uslugama podrazumjevaju se:

- a) organizovanje sastanaka prodavca i kupca u skladu sa propisima i pravilima berze;
- b) objavljivanje cijena za proizvode koji su bili predmet berzanskih poslova, objavljivanje podataka o njihovim količinama, rokovima isporuke, kvalitetu i asortimanu;
- c) organizovanje prodaje pojedinih proizvoda na javnoj licitaciji, odnosno aukciji;
- d) davanje obavještenja o stanju na tržištu.

(3) Robna berza obavlja i druge poslove, pruža i druge usluge koje su običajene u poslovanju robnih berzi i koji su određeni njihovim pravilima.

#### **Član 41. (Usluge u oblasti marketinga)**

Usluge u oblasti marketinga su usluge istraživanja tržišta i tržišnog komuniciranja kao npr. ekonomska propaganda, reklama, izložba i slično, kao i druge usluge koje se obavljaju u ime i za račun komitenta.

#### **Član 42. (Pijaca na veliko)**

Usluge pijace na veliko vrše se na posebno organizovanim mjestima na kojima se prodaju i kupuju na veliko poljoprivredni, prehrambeni i drugi proizvodi radi dalje prodaje ili prerade.

#### **Član 43. (Pijačni red pijace na veliko)**

(1) Trgovac koji vrši usluge pijace na veliko utvrđuje pijačni red kojim se utvrđuju pijačna pravila za izlaganje robe, način prodaje kao i druga pravila za obavljanje trgovine u pijaci na veliko.

(2) Na pijačni red saglasnost daje Kancelarija za upravljanje javnom imovinom, koja može uskratiti davanje saglasnosti ako ocijeni da se pijačnim redom trgovina reguliše suprotno interesima korisnika usluga i kupaca, posebno u pogledu higijensko sanitarnih uslova i zaštite čovjekove okoline.

(3) Trgovac koji vrši usluge pijace na veliko i korisnici usluga dužni su da se pridržavaju utvrđenog pijačnog reda iz stava (1) ovog člana.

**Član 44.**  
**(Usluge pijace na veliko)**

(1) Usluge pijace na veliko su:

- a) stavljanje na raspolaganje prostora i prostorija za izlaganje i prodaju poljoprivrednih, prehrambenih i drugih proizvoda na veliko;
- b) uskladištenje poljoprivrednih, prehrambenih i drugih proizvoda, i korištenje sredstava za manipulaciju tim proizvodima;
- c) obavljanje prevoza, otpreme i dopreme kao i poslovi održavanja kvaliteta i kvantiteta poljoprivrednih proizvoda.

(2) Pijaca na veliko pored usluga iz stava (1) ovog člana, može se baviti trgovinom na veliko i malo kao i otkupom poljoprivrednih, prehrambenih i drugih proizvoda i prodajom tih proizvoda na veliko i malo.

**Član 45.**  
**(Pijaca na malo)**

(1) Usluge pijace na malo vrše se na organizovanom i uređenom mjestu na kojem se na uobičajen način obavlja trgovina na malo poljoprivrednim i prehrambenim proizvodima, robe svakodnevnih potrošnje, zanatskih proizvoda, proizvoda domaće radinosti i ostale robe koja se po svojim osobinama može izložiti u pijačnoj trgovini.

(2) Pijace na malo organizuju se i uređuju kao zasebne cjeline ili fizički odvojene podcjeline jedne cjeline i to kao:

- a) zelene pijace na malo, odnosno zelene pijace;
- b) robne pijace na malo, odnosno robne pijace;
- c) kvantaške pijace na malo;
- d) pijace na malo za prodaju korišćene robe;

f) pijace na malo autima, odnosno auto-pijace.

(3) Pijačni red na pijaci na malo u vlasništvu Distrikta utvrđuje se pravilnikom koji donosi direktor Kancelarije za upravljanje javnom imovinom.

(4) Trgovac koji vrši usluge pijace na malo utvrđuje ~~tržnim~~ pijačnim redom asortiman proizvoda i uslove za obavljanje trgovine.

(5) Na pijačni red iz stava (4) ovog člana, saglasnost daje Kancelarija za upravljanje javnom imovinom.

(6) Trgovac koji vrši usluge pijace na malo i korisnici usluga dužni su se pridržavati utvrđenog pijačnog reda.

**Član 46.**  
**(Ko može obavljati trgovinu na pijaci na malo)**

(1) Trgovinom na pijacama na malo mogu da se bave registrovani trgovci.

(2) Trgovinom bez registracije mogu se baviti fizička lica koja se bave poljoprivrednom proizvodnjom i fizička lica proizvođači u domaćoj radinosti.

(3) Fizička lica koja se bave poljoprivrednom proizvodnjom iz stava (2) ovog člana mogu bez registracije prodavati isključivo voće, povrće i druge poljoprivredne proizvode koje su proizvela na svom poljoprivrednom gazdinstvu.

**Član 47.**

### **(Trgovinski centar)**

- (1) Trgovinski centar je posebno izgrađena ili u postojećem objektu uređena prostorna cjelina koja se sastoji od više pojedinačno opremljenih poslovnih prostora, u kojima se obavlja trgovina na malo i pružaju trgovinske i druge usluge.
- (2) Trgovac koji je registrovan za vršenje usluge trgovinskog centra, donosi kućni red kojim se bliže utvrđuje poslovanje trgovinskog centra.
- (3) Trgovac koji pruža usluge u trgovinskom centru i korisnici usluga dužni su se pridržavati kućnog reda iz stava (2) ovog člana.

### **Član 48. ( Usluge stočne pijace)**

Usluge stočne pijace vrše se na posebno organizovanom, uređenom i tehnički opremljenom mjestu na kojem se vrši trgovina stokom.

### **Član 49. (Pijačni red na stočnoj pijaci)**

- (1) Trgovina na stočnoj pijaci odvija se po pijačnom redu koji donosi trgovac koji je registrovan za vršenje usluge stočne pijace.
- (2) Trgovac koji pruža usluge na stočnoj pijaci i korisnici usluga dužni su se pridržavati pijačnog reda iz stava (1) ovog člana.

### **Član 50. (Vašar)**

- (1) Vašar je jednokratno posebno organizovan oblik usluge na kojem se na uobičajen način vrši trgovina poljoprivrednim i drugim proizvodima.
- (2) Vašarski red i uslovi pod kojima se odvija trgovina na vašarima utvrđuje se Odlukom koju donosi direktor Kancelarije za upravljanje javnom imovinom.

### **Član 51. (Sajam)**

- (1) Sajam je mjesto gdje izlagači i posjetioци neposrednim kontaktima međusobno razmjenjuju informacije o prednostima i unapređenjima proizvoda i usluga u cilju prodaje, kao i neposredne prodaje.
- (2) Sajam priređuje pravno lice koji je registrovano za obavljanje tih poslova.
- (3) Pravno lice koje se bavi priređivanjem sajmova pridržava se rokova predviđenih u kalendaru sajmova, koji se utvrđuje u dogovoru sa komorom.

### **Član 52. (Aukcijska kuća)**

Aukcijska kuća je pravno lice koje kao posebna tržišna institucija organizuje promet nestandardizovane robe za tuđi račun putem javnog nadmetanja.

## **GLAVA IV – ZAŠTITA POTROŠAČA I NEDOPUŠTENI TRGOVANJE**

### **Član 53. (Zaštita potrošača)**

Na pitanja koja se odnose na zaštitu potrošača, obaveze i odgovornosti trgovaca u oblasti trgovine na veliko, trgovine na malo, pružanje trgovačkih usluga supsidijarno se primjenjuje Zakon o zaštiti potrošača u Bosni i Hercegovini.

### **Član 54. (Nedopuštena trgovina)**

Nedopuštenom trgovinom smatra se:

- a) reklamiranje, oglašavanje ili ponuda robe ili usluga navođenjem podataka ili upotrebom izraza s kojima se iskorištava ugled drugog trgovca, njegovih proizvoda ili usluga i čime se stvara zabuna na tržištu;
- b) davanje podataka o drugom trgovcu, ako ti podaci nanose ili mogu nanijeti štetu ugledu i poslovanju tog trgovca;
- c) prodaja robe s oznakama ili podacima ili izgledom koji stvaraju ili bi mogli stvoriti zabunu u pogledu porijekla, načina proizvodnje, količine, kvalitete ili drugih osobina robe;
- d) radnje trgovaca usmjerene na prekid poslovnih odnosa, između drugih trgovaca ili koje sprečavaju ili otežavaju poslovne odnose drugih trgovaca,
- e) neopravdano neispunjavanje ili raskidanje ugovora s pojedinim trgovcem kako bi se sklopio isti ili povoljniji ugovor s drugim trgovcima;
- f) neovlaštena upotreba imena, žiga, marke, industrijskog dizajna ili koje druge oznake drugog trgovca;
- g) davanje ili obećanje darova, imovinske ili druge koristi drugom trgovcu, njegovom radniku ili osobi koja radi za drugog trgovca, kako bi se davatelju omogućila pogodnost na štetu drugog trgovca ili potrošača;
- h) neovlaštena upotreba usluga trgovačkog putnika, trgovačkog predstavnika ili zastupnika drugog trgovca;
- i) protupravno pribavljanje poslovne tajne drugog trgovca ili bespravno iskorištavanje povjerene poslovne tajne drugog trgovca;
- j) uslovljavanje kupovine jedne robe kupovinom druge robe ili uslovljavanje kupovine i prodaje robe na drugi način;
- k) zaključivanje fiktivnih ugovora o kupovini i prodaji robe i usluga.
- l) prikrivanje robe, ograničavanje ili obustavljanje prodaje robe i druge radnje kojima se prouzrokuje poremećaj na tržištu

### **Član 55. (Naknada štete)**

- (1) Naknada štete nastala nedopuštenom trgovinom ostvaruje se u sudskom postupku.
- (2) Tužbu iz stava (1) ovog člana može podnijeti trgovac i druge pravne i fizičke osobe koje imaju pravni interes.
- (3) Pravo na tužbu iz stava (1) ovog člana zastarijeva u roku od jedne godine od dana kada tužitelj sazna za djelo i izvršitelja, a najkasnije u roku od tri godine od dana izvršenja djela.

## **GLAVA V – PRIVREMENE MJERE RADI SPREČAVANJA I OTKLANJANJA POREMEĆAJA NA TRŽIŠTU**

### **Član 56. (Privremene mjere)**

- (1) Vlada može posebnim propisom privremeno ograničiti obavljanje trgovine u slučaju:
- a) prirodnih i drugih nesreća u BiH, kada nastane ili bi mogao nastati osjetni poremećaj u trgovini, poremećaj u snabdijevanju stanovništva, ili poremećaj na drugim područjima koja ugrožavaju siguran i zdrav život građana; b) značajnih poremećaja na domaćem tržištu zbog pomanjkanja robe nužno potrebne za proizvodnju, preradu i za život građana;
- (2) Vlada propisuje ograničenja obavljanja trgovine u slučajevima iz stava 1) ovoga člana samo ako poremećaj nije moguće otkloniti drugim mjerama ili ako potrebe nije moguće podmiriti iz robnih rezervi, uvozom ili drugim mjerama ekonomske politike.

### **Član 57. (Vrste privremenih mjera)**

- (1) Kao privremenu mjeru Vlada može uvesti:
- a) zabranu trgovine određenim proizvodima, uključujući i izvoz, ograničenje trgovine pojedinim proizvodima u pogledu količine, kvaliteta ili drugih svojstava proizvoda ili određivanje posebnih uslova za kupovinu i prodaju pojedinih proizvoda tzv. kupovina po odobrenju ili drugoj ispravi;
- b) zabranu preduzećima, drugim pravnim licima i preduzetnicima vršenje prometa određenih proizvoda;
- c) zabranu upotrebe određenih proizvoda u proizvodnji drugih određenih proizvoda;
- d) obavezu određenim preduzećima i drugim pravnim licima i preduzetnicima da stave u promet određene vrste i količine proizvoda ili da ih stave na raspolaganje, odnosno da ih isporuče određenim korisnicima po određenom rasporedu;
- e) broj posrednika u trgovini na veliko određenih proizvoda između preduzeća, drugih pravnih lica i preduzetnika koja se bave proizvodnjom, odnosno uvozom i preduzeća i drugih pravnih lica i preduzetnika koji vrše promet na malo;
- f) obavezu određenih preduzeća, drugih pravnih lica i preduzetnika da obrazuju i drže u rezervi određene vrste i količine proizvoda;
- g) obavezu određenih preduzeća, drugih pravnih lica i preduzetnika da prevoze robu i ostala dobra;
- h) obavezu određenih preduzeća, drugih pravnih lica i preduzetnika koja koriste usluge prevoza željeznicom da u određenom roku istovare, odnosno utovare robe;

i) obavezu određenih preduzeća, drugih pravnih lica i preduzetnika da u svojim skladištima čuvaju određenu robu i da istovaraju, odnosno utovaraju određenu robu.

(2) Mjere iz stava (1) ovog člana traju do otklanjanja razloga koji su doveli do uvođenja tih mjera.

## **GLAVA VI – INSPEKCIJSKI NADZOR I UPRAVNE MJERE**

### **Član 58. (Nadzor)**

(1) Upravni nadzor nad provođenjem ovoga zakona i propisa donesenih na osnovu ovoga zakona vrši Odjeljenje.

(2) Inspekcijski nadzor nad primjenom ovoga zakona vrši nadležna inspekcija u skladu sa ovlaštenjima utvrđenim posebnim propisima.

### **Član 59. (Zabrana obavljanja djelatnosti)**

(1) Ako preduzeće, drugo pravno lice, preduzetnik ili fizičko lice obavlja promet robe ili vrši trgovinske usluge bez registracije ili mimo registracije i bez rješenja iz člana 7. stav (4) ovog zakona, tržišni inspektor donosi rješenje kojim se zabranjuje vršenje takve djelatnosti.

(2) Ako se u obavljanju inspekcijskog nadzora utvrdi da trgovac čini neku radnju koja se u smislu člana 54. ovoga zakona smatra nedopuštenom trgovinom, tržišni inspektor donosi rješenje o njezinoj zabrani.

### **Član 60. (Kontrola kvaliteta robe)**

(1) Tržišni inspektor prilikom vršenja kontrole kvaliteta robe u prometu utvrđuje organoleptički kvalitet za svojstva robe za koja se može utvrditi kvalitet na takav način ili uzima uzorak radi davanja na analizu ovlaštenim institucijama.

(2) Ako tržišni inspektor utvrdi da roba koja je stavljena u promet, nije u skladu sa standardima i kvalitativnim normama propisanim ili priznatim na tržištu Distrikta, odnosno Bosne i Hercegovine donosi rješenje o zabrani prodaje, odnosno upotrebe.

(3) Za robu iz stava (2) ovog člana, vlasnik robe, u skladu sa propisima:

- a) otklanja nedostatke na robi;
- b) vraća robu dobavljaču;
- c) mijenja namjenu ili
- d) uništava robu.

(4) Vlasnik robe prije postupanja sa robom u skladu sa stavom (3) ovog člana dužan je obavijestiti inspektora o načinu i vremenu postupanja.

(5) Žalba na rješenje ne odlaže izvršenje rješenja.

### **Član 61. (Kontrola sigurnosti proizvoda)**

Tržišni inspektor nadzire usklađenost proizvoda koji su stavljani na tržište sa zahtjevima

za sigurnost proizvoda utvrđenim Zakonom o opštoj sigurnosti proizvoda i posebnim tehničkim propisima, ispunjavanje obaveza proizvođača i distributera sadržanih u ovim propisima te preduzima mjere i radnje, kako bi se osigurala usklađenost proizvoda sa propisanim sigurnosnim zahtjevima.

**Član 62.**  
**(Privremeno oduzimanje predmeta)**

(1) Tržišni inspektor može privremeno oduzeti predmete koji su bili upotrijebljeni, namijenjeni za izvršenje prekršaja ili su nastali izvršenjem prekršaja.

(2) O oduzetim predmetima tržišni inspektor izdaje potvrdu o privremenom oduzimanju predmeta i rješenje o oduzimanju predmeta u propisanom roku.

**Član 63.**  
**(Otklanjanje nedostataka)**

(1) Nadležni inspektor rješenjem određuje rok do kojeg nedostaci moraju biti otklonjeni ako utvrdi:

a) da se djelatnost trgovine obavlja mimo registracije ili mimo odobrenja za obavljanje trgovinske djelatnosti;

b) da su uređaji i oprema namijenjeni za obavljanje trgovine i vršenje usluga prestali ispunjavati propisane minimalne tehničke uslove, kao i uslove tehničke opremljenosti.

(2) Ako nedostaci iz stava (1) ovoga člana ne budu otklonjeni u određenom roku, nadležni inspektor donosi rješenje o:

a) zabrani obavljanja djelatnosti,

b) zatvaranju prostora ili

c) zabrani upotrebe uređaja i opreme.

**Član 64.**  
**(Udovoljavanje osnovanom zahtjevu potrošača)**

Tržišni inspektor donosi rješenje kojim naređuje trgovcu da udovolji osnovanom zahtjevu potrošača ako trgovac neopravdano odbije zahtjev potrošača da:

a) robu koja ima nedostatke zamijeni novom robom;

b) vrati iznos za plaćenu robu ili

c) uz saglasnost potrošača otkloni nedostatak na robi.

**GLAVA VII – KAZNE NE ODREDBE**

**Član 65.**  
**(Novčana kazna od 1.000,00 do 15.000,00 KM)**

(1) Novčanom kaznom od 1.000,00 KM do 15.000,00 KM kaznit će se za prekršaj preduzeće ili drugo pravno lice ako:

a) prodaje robu koja ne ispunjava propisani kvalitet (član 4. stav (2) ovog zakona);

b) obavlja djelatnost u prodajnom objektu ili drugom prodajnom mjestu koje ne ispunjava minimalno-tehničke uslove (član 6. stav (3) ovog zakona);

c) obavlja trgovinu bez rješenja kojim mu se odobrava obavljanje djelatnosti (član 7. stav

- (1) ovog zakona);
  - d) podnese netačnu izjavu iz člana 7. stav (3) tačka a) ovog zakona);
  - e) obavlja trgovinu bez upisa djelatnosti u registar suda (član 9. stav (1) ovog zakona);
  - f) ne drži ili ne vodi ažurno trgovačku knjigu i drugu evidenciju (član 12, član 22. stav (1), (2), (3) i (4) i član 32. ovog zakona);
  - g) stavi u promet robu koja nije evidentirana u trgovačkoj knjizi (član 22. stav (5) ovog zakona);
  - h) u usvakoj fazi prometa ne posjeduje vjerodostojnu dokumentaciju i koju na zahtjev inspektora ne učini dostupnom (član 23. ovog zakona);
  - i) preduzme neku od radnji koja predstavlja nedopušteno trgovanje (član 54. ovog zakona);
  - j) se ne pridržava privremenih mjera donesenih radi sprečavanja i otklanjanja poremećaja na tržištu Distrikta član 57. ovog zakona).
- (2) Za prekršaj iz stava (1) ovog člana kazniće se za prekršaj i odgovorno lice u preduzeću ili drugom pravnom licu novčanom kaznom od 400,00 KM do 2.000,00 KM.
- (3) Za prekršaj iz stava (1) ovog člana kazniće se preduzetnik novčanom kaznom od 500,00 KM do 1.500,00 KM.

**Član 66.**  
**(Novčana kazna od 300,00 do 3.000,00 KM)**

- (1) Novčanom kaznom od 300,00 KM do 3.000,00 KM kazniće se za prekršaj preduzeće ili drugo pravno lice ako:
- a) na prodajnom objektu ne istakne naziv kako je registrovan (član 6. stav (4) tačka a) ovog zakona);
  - b) na uočljiv način ne istakne radno vrijeme (član 6. stav (4) tačka b) ovog zakona);
  - c) na vidnom mjestu ne istakne obavještenje da se ne vrši prodaja alkoholnih i drugih pića koja sadrže alkohol, duhana i prerađevina od duhana licima mlađim od 18 godina (član 6. stav (4) tačka c) alineja 2 ovog zakona);
  - d) ne formira ili ne istakne cijenu robe, koju stavlja u promet, u domaćoj valuti (član 6. stav (4) tačka c) alineja 3);
  - e) ne izda račun za prodatu robu (član 6. stav (4) tačka c) alineja 4) ovog zakona);
  - f) ne postupa u skladu sa članom 6. stav (4) tačka d) ovog zakona);
  - g) ne drži u poslovnim prostorijama, odnosno prodajnom mjestu rješenje kojim mu se odobrava obavljanje trgovinske djelatnosti (član 9. stav (2) ovog zakona);
  - h) obavlja prodaju robe preko pokretne prodavnice ili drugog oblika privremene prodaje suprotno članu 14. ovog zakona);
  - i) u katalogu za prodaju robe ne označi prodajne cijene, druge uslove prodaje, vrijeme važenja cijena i uslova (član 16. ovog zakona);
  - j) ne vodi propisanu evidenciju, kupcu ne izda potvrdu o redu uplate ili se pri isporuci ne pridržava reda uplate ili kupca bez njegove saglasnosti briše iz evidencije (član 20. ovog zakona);
  - k) vrši otkup poljoprivrednih proizvoda, šumskih plodova i stoke suprotno odredbama ovog zakona ( član 24, član 25, član 26, član 27. ,član 28. i član 29, ovog zakona);
  - l) ne utvrdi ili ako se ne pridržava pijačnog, vašarskog i kućnog reda, odnosno sajamskih rokova (član 43, član 45, član 47, član 49, član 50. i član 51. ovog zakona);
  - m) prije postupanja sa robom u skladu sa članom 60. stav (3)ne obavijestiti inspektora o

načinu i vremenu postupanja (član 60. stav (4)).

(2) Za prekršaj iz stava (1) ovog člana kazniće se odgovorno lice u preduzeću ili drugom pravnom licu novčanom kaznom od 100,00 KM do 500,00 KM.

(3) Za prekršaj iz stava (1) ovog člana kazniće se preduzetnik novčanom kaznom od 200,00 KM do 500,00 KM.

#### **Član 67.**

##### **(Novčana kazna od 200,00 do 5.000,00 KM)**

(1) Novčanom kaznom od 200,00 KM do 5.000,00 KM kazniće se za prekršaj fizičko lice ako:

a) obavlja trgovinsku djelatnost a nije se registrovalo za obavljanje te djelatnosti (član 3. stav (1) ovog zakona);

b) obavlja trgovinsku djelatnost u suprotnosti sa članom 14. ovog zakona;

c) prodaje poljoprivredne proizvode i proizvode domaće radinosti suprotno članu 46. ovog zakona;

d) preduzme radnje koje predstavljaju nedopuštenu trgovinu iz člana 54. tačke c) i f).

(2) Za prekršaj iz stava (1) ovog člana može se izreći i zaštitna mjera oduzimanja predmeta prekršaja.

#### **Član 68.**

##### **(Novčana kazna od 100,00 do 500,00 KM)**

Novčanom kaznom od 100,00 KM do 500,00 KM kazniće se za prekršaj poljoprivredni proizvođač ili fizičko lice ako kupuje, odnosno prodaje stoku suprotno članu 30. ovog zakona.

#### **Član 69.**

##### **(Zaštitna mjera)**

Za prekršaj iz člana 65. stav (1) tačka g), h) i i) ovog zakona učiniocu će se izreći zaštitna mjera:

a) oduzimanja predmeta koji su upotrijebljeni ili bili namijenjeni za izvršenje prekršaja ili koji su nastali izvršenjem prekršaja;

b) zabrana obavljanja određenom djelatnošću trgovcu u trajanju do šest mjeseci.

## **DIO TREĆI - PRELAZNE I ZAVRŠNE ODREDBE**

#### **Član 70.**

##### **(Podzakonski akti)**

Šefovi nadležnih odjeljenja i direktor Kancelarije za upravljanje javnom imovinom Brčko distrikta BiH dužni su podzakonske akte propisane ovim zakonom donijeti u roku od šest mjeseci od dana stupanja na snagu ovog zakona.

**Član 71.**  
**(Ranije započeti postupci)**

Na postupke koji su pokrenuti prije stupanja na snagu ovog zakona primjenjuju se propisi koji su važili do dana stupanja na snagu ovog zakona.

**Član 72.**  
**(Stavljanje van snage)**

(1) Danom stupanja na snagu ovog zakona stavlja se van snage Zakon o trgovini („Službeni glasnik Brčko distrikta BiH“ broj: 40/04 i 19/07).

(2) Do stupanja na snagu propisa iz člana 70. ovog zakona, ostaju na snazi propisi koji su se primjenjivali u vrijeme donošenja ovog zakona.

**Član 73.**  
**(Stupanje na snagu)**

Ovaj Zakon stupa na snagu osmog dana od dana objavljivanja u „Službenom glasniku Brčko distrikta Bosne i Hercegovine“.

Predsjednik Skupštine

Brčko distrikta BiH

Esad Atić, dipl. ing.tehnologije